



## Gòcius de is santus de Tortolì



## GÒCIUS DE SANT' ANDRIA APÒSTULU

Protetori universali,  
Apòstulu prodigiosu,  
**Liberainosì de mali,**  
**Andria santu gloriosu!**

Bethsaida, pàtria diciosa,  
Sa bella sorti at tentu;  
inni nascis, grandu portentu,  
In s'era prus tenebrosa,  
Cali lillu e cali rosa  
In unu campu spinosu.

Tratas gai de perfetzioni  
Picinnu de pagus annus,  
E conoscis cun afannus,  
Cun assìdua oratzioni  
E perfeta rassignatzioni  
A su Deus tuu amorosu.

Po essi veru imitadori  
De su Deus umanau,  
Tui su primu ses'istau  
Apòstulu de su Signori;  
In sa vida de s'amori  
Ti mostras prus fervorosu.

De is pòburus afluxius  
Ses babu consoladori,  
Tui rèputas grand'onori  
Ch'issus siant assistius,  
Mantenius e bestius  
Cun afetu carignosu.

De amori totu inflamau  
Chi a Gesùs sèmpiri as tentu,  
Ogna mali sufris cuntentu  
Chi su mundu t'at portau,  
E po Issu ses arribau  
sa vida a donai gustosu.

Tzurpus, mudus, istrupiaus  
Incontrant in tui remèdiu,  
De Deus ti benit cuntzèdiu  
Chi medas ispiridaus  
Bengant in tui liberaus  
De su nimigu furiosu.

Po continu binticinc'annus  
De apostòlica missioni,  
Cun s'esèmpiu e s'arregoni  
Avertis is disingannus  
A piticus e a mannus,  
fendi de babu piedosu.

Egea, iniqu tirannu,  
Biendi tantu conversionis,  
Cun flagellus e presonis  
ti bolit poni in afannu,  
Ma nc'est unu Deus mannu  
Chi in sa pena donat gosu.

Finalmenti s'infideli,  
Spantau de tantu firmesa,  
Bolit teni cumentesa  
Chi tengas morti crudeli  
De ràbiu prenu e de feli  
Ti preparat suplìziu penosu.

Sa crudeli grugi biendi  
Chi Egea ti presentat,  
Su coru tu si cumentat  
E dd'abratzas esultendi,  
Gràtzias a celu rendendi  
De tanti donu pretziosu.

Bintimila de personis  
Convertis a sa vera lugì,  
Predichendi de sa grugi  
Cun isplèndidus sermonis;  
Bolit Deus chi aici coronis  
Su martiriu portentosu.

In edadi med'avantzada s  
Sa bell'ànima a Deus rendis,  
Duas dis in sa grugi pendis  
Tra sa genti spasimada;  
Is àngelus a cambarada  
Ti faint cortègiu amorosu.

Ses discìpulu costanti,  
Apòstulu prus che potenti,  
Ses màrtiri ancora valenti  
E in sa fidi triufanti,  
Che ràgiu de soli brillanti  
Illùminas maestosu.

De cudd'altu splendori  
Aundi regnas sublimau,  
Custu pòpulu a tui sagrâu  
Mira cun atu de amori.  
Sias de issu difensori,  
Assistènzia, pagi e gosu!

Protetori universali,  
Apòstulu prodigiosu,  
Liberainosì de mali,  
Andria santu gloriosu!

## AVE MARIS STELLA

Genna de celu poderosa  
De su celu seis ghia  
**Ave Vírgini Maria**  
**Stella de mari luminosa**

Su Missu celestiali  
Bos saludat cun Deus  
Su de Eva mudeus  
Cun sa Gràtzia supernali  
Dispaciai su mali  
Donai pàgi meritosa

Su pòberu oprimiu  
Liberai de sa cadena  
Siat de bosu assistìu  
Cun sa bosta preghiera  
Mosteisi cali seis vera  
Lugi santa pretziosa

Benei mama potenti  
Pigai custa perghiera  
fata cun fidi vera  
Erricia siat prontamenti  
De Cristu su benenti  
In bos mama carignosa

Chi biaus a Gesùs  
In sa santa allirghìa  
Abilla po nos sa bia  
Dona pagi prus e prus  
fradis Sentza farta prus  
Torreisi, Mama piedosa

Glòria a su Babbu Soberanu  
E a su Fillu su amau  
A su Spìridu mandau  
Po ònnia cristianu  
Custu innu eremitanu  
Fatu siat cun fidi amorosa

Genna de celu poderosa  
De su celu seis ghia  
**Ave Vírgini Maria**  
**Stella de mari luminosa**

## GÒCIUS DE SANTU GIUSEPI SPOSU DE MARIA

Tui chi as aguardau  
Maria e su Signori,  
**Sias nostru protetori,**  
**Giusepi santu istimau!**

Tui de David ses areu,  
E ses dignu de s'Isposa:  
Issa puru de sa gloriosa  
Arentzia chi at donau Deu,  
In su pòpulu giudeu  
beneditu sangunau.

Isposau as cun amori  
Maria s'Imaculada  
De s'Altissimu adumbrada,  
Su prus càandidu fiori,  
E su Fillu Redentori  
de coru as acetau.

In is mesis de s'aspetu  
Cun sa Vírgini as pregau,  
Issa totu t'at contau  
De s'annùntziu e de s'efetu  
Po su Ninnu ch'in su petu  
Fiat crescendi istimau

A Bellei cun Maria  
po romanu censimentu  
Andau ses , prus atentu  
Po s'antiga profetzia  
Sa citadi de su Messia  
As luegu arregodau.

As errìciu cun amori  
Is pastoris ispantaus  
E ddis as amostrau.  
Cun sa Mama su Signori  
De su mundu Salvadori  
Gesùs as presentau.

Su fueddu de Simeoni  
Ti donat pensamentu,  
Is paràulas che bentu  
Fritu de setentrioni  
Movit prestu s'orassioni  
Po s'amparu disillau

Is tres Res de s'orienti  
Donus mannus ant portau  
Mirra, incensu oru amirau  
Ant is ogrus de sa genti,  
Ma cumprèndiu at sa menti  
Su chi fiat significau.

De Erodes, re crudeli,  
Ses istadu defensori  
E custodi protetori  
Imbincibili e fideli  
Contra su bàrbaru feli  
Tui fiast predestinau.

Brègiu in coru nos porteus  
E calori de fidi alluta  
Ca est násciu in sa gruta  
S'incarnau Fillu de Deus  
Po s'iscuru òmini reu  
chi in printzìpiu at pecau

Trebballendi sempri impari  
Beni s'arti as insignau,  
Su Pipiu at imparau  
Totu, celu, terra e mari,  
E sa stòria salutari  
De su pòpulu sceberau.

A sa fini de sa vida  
As errìciu ogni agiudu  
E s'abratzu e su saludu  
De s'Isposa tua afluxida,  
Po sa trista dispedida  
Gesùs t'at cunfortau.

Cun Gesùs e cun Maria  
De s'Egitu ses torrau  
Cun premura as pesau  
Su generosu Messia  
Postu in primu gerarchia,  
Peti a issu as pensau.

De s'amori isponsali  
E paternu ses esèmpiu,  
In su mundu malu, èmpiu,  
Salvanosì de ogni mali,  
De sa Cresia universali  
Ses patronu proclamau

Tui chi as aguardau  
Maria e su Signori,  
Sias nostru protetori,  
Giusepi santu istimau!

## GÒCIUS DE SU SANTISSIMU SALVADORI

Divinu Eternu Signori,  
Po nosu Verbu Incarnau;  
**Salvainosì de pecau,**  
**Gesus nostru Signori**

Cun prodìgiu sentza uguali,  
Segundu sa profetzia,  
In su sinu de Maria  
Pigais forma mortali;  
Perdonu e gràtzia speciali  
Cunzedendi a su pecadori.

Cun imensa caridadi  
Po consolu de is mortalis,  
Nasceis intra animalis,  
De Betlem in sa citadi,  
Imparendi umilidadi  
A superbu e traitori

Po su sànguini pretziosu,  
chi po nosu eis derramau  
Po su Coru bostu liagau  
In su Calvariu penosu,  
Perdonainosì, piedosu,  
In cudda di de rigori.

A is tres dis risuscitau  
Cun grandu giubìliu e gosu,  
Pustis totu gloriosu  
Seis a celu artziau,  
Distruendi su pecau,  
Vitoriosu e bincidori.

Saludi seis e vida  
De s'aflìgiu e dolenti,  
In Bosu su penitenti  
Tenit sa gràtzia cumplida:  
Alcanzendi repertina  
S'ànima, donu de amori.

Puru Angioni Imaculau  
De celu e terra bellesa.  
Amanti de sa puresa  
E nemigu de su pecau;  
Eus po bosu acuistau  
Paradisu, gràtzia e onori.

Cun coràgiu e amiratzioni  
Curastis sa pestilèntzia,  
Chi girat senza clemèntzia  
Totu sa Sarda Natzioni;  
Cunservendi sentza lesioni  
Dogna sardu abitatori.

Su Prus Santu, su prus bonu,  
Gesùs nostru Onnipotenti  
Aclamaus continuamenti  
De celu e terra patronu  
De gràtzia su veru donu  
Dimandaus, oh Signori.

# GÒCIUS DE SU GLORIOSU MÀRTIRI SANTU LUSCIORI

Cavalieri rispetau,  
de Sardigna risplendori  
**Sias nostru intercessori**  
**Lusciори Santu avocau.**

Illustri e forti campioni,  
Ses de Casteddu ornamentu,  
De nobili nascimentu  
Ma de falsa religioni.  
Negas s'adoratzionia  
su Deus umanau.

Su nòmini tu, Lusciори,  
Indicat ardenti lugи,  
Po chi risplendat sa grugi  
De Gesùs nostru Signori  
Po dissipai s'errori  
De is gentilis abratzau.

De is annus su mellus frori,  
A is militaris impresas  
Dedicas, e cun prodesas  
Dimostras grandu valori  
Diocletzianu imperadori  
Meda stima t'at mostrau.

Unu salmu in sa scritura,  
Sendi lìgiu po accidenti  
As provau internamenti  
Una celesti dorciura  
Po custa sola litura  
Ses cunvèrtiu e batiau.

Spintu de onori vementi,  
Abandonas cun pretesas  
Onoris, domu e richesas  
Po bivi penitenti  
Sentza de consòrziu de genti,  
In una gruta inserrau.

Acanta de Monteleone,  
Est cussa gruta orrorosa  
Innia grata e delitziosa  
Ti fissas s'abitatzioni  
Su digiunu e s'oratzioni  
Est su pastu prelibau.

Biendu chi s'idolatria,  
Totu s'isola infetada  
Lassas cussa gruta amada  
E partis cun allegria  
Ses a totus, lugи e ghia  
Po distrugi su pecau.

Dealàsiu su presidenti,  
Scit chi sa lei pagana  
Dispretzas, e a sa cristiana  
As cunvèrtiu meda genti  
Dona òrdini imponenti  
Po chi bengas arrestau.

S'astutu circat maneras,  
De ti podit dissuadiri  
E prontas ti fait biri  
Penas duras e severas;  
Cun regonis is prus veras  
Dd'as cunvintu e annientau.

Mi declaru Cristianu  
Intrépidu ddi respundis  
Avilessis e cunfundis  
Su Presidenti romanu  
Chi crudeli e disumanu  
T'at a morti cundennau

Delàsiu tennit timori,  
De unu motu populari,  
Poita ses de singulares  
Parentela e de valori ;  
E a Fordongianus s'onori  
De unu màrtiri at donau.

De Casteddu a Fordongianus,  
Ses portau segretamenti  
Ti flagellant aspramenti  
In d-unu modu inumanu  
Non ti lassant ossu sanu,  
Ses po mortu abandonau.

Su divinu Redentori,  
Ti risanat is feridas,  
Cussas gràzias erricidas  
Predicas cun prus ardori;  
Cali apòstolu de amori  
Ses de totus ascurtau.

T'aparìcias a sa morti  
Penitenti in su desertu;  
Innia Deus ti rendit certu  
Cussa bella e rara sorti;  
Cun sa fidi prus che forti  
A Casteddu ses torrau.

Delàsiu cun amargura  
Scit chi ses ancora biu  
E fortementi inaspriu  
Ndi rinnovat sa catura;  
E ordinat chi cun premura  
Bèngias foras degogliau.

Sendi andendu a su destinu  
Sighiu t'ant dus pipius  
In sa pròprietà sorti unius  
Zizèlllicu e Camerinu;  
Lillus de gratu giardinu  
Chi su celu at concuistau.

Selàrgius t'at erriciu  
Su sàmbini generosu;  
E de is àngelus su gosu  
Su Spiritu at cunsighiu  
Su corpus t'ant'afligiu  
Ccun onori est sepultau.

Teni de is Sardus memòria  
Difendi sa Pàtria amada,  
Po chi sa fidi abratzada  
Mantengàus cun vitòria  
De cussu sòigliu de glòria  
Protegi su sconsolau.

## GÒCIUS DE SANTU MILLANU

S'Onnipotenti t'at fatu  
de sa fidi difensori  
**Millanu vivu ritratu**  
**de Gesus su veru pastori**

In su Tempus de Neroni  
Nascis de babu paganu  
De pàtria cagliaritanu  
Gentili de professioni  
Tui totu in s'educatzioni  
Conoscis su Redentori

Candu intendis is sermonis  
De santu Giacu e Clementi  
Abandonas prontamenti  
Is falsas adoratzionis  
E cumprendis is aregionis  
De sa lei de prus valori

Santu Perdu t'at batiau  
E ordinau de Sacerdotu  
Po essi tui prudenti e dotu  
T'at de Obispu cunsagrau  
Sendu de Casteddu prelau  
Dimostras zelu e fervori.

Cun frècias e tormentus  
Ti ordinat Felis tirannu  
Chi abbandonis, o Millanu  
Is catòlicus intentus  
Ma cun Santus pentzamentus  
Dispretzas tanti rigorì.

Ti fulmina a s'istanti  
Una sentèntzia de morti  
Po ti biri tanti forti  
In sa lei firmu e costanti  
Cun su petus che diamanti  
Predichendu cun fervori.

In sa pianura de Sestu  
Su sàmbini as tui versau  
Crudelmenti aperdiau  
Po non morri tantu prestu  
Ccustu barbaru turmentu  
Abivat prus su valori.

Ses mèdicu prodigiosu  
Chi curas ogna dolèntzia  
Callenturas e schinèntzia  
Cun totus ses amoro  
Ses de ogna chesciosu  
Veru babu e protetori.

Sa Sardigna totu cantu  
Ti tenit in devotzioni  
Cun legitima aregioni  
Is sardus ti nant Santu  
Nascis po divinu spantu  
Moris po divinu amori.

## GÒCIUS DE SANTU GIÒRGIU OBISPU

Miràbili protetori,  
Chi cun Deus podis tantu,  
**Giòrgiu obispu, illustri Santu  
de Sardigna risplendori**

In Casteddu ses cumpartu  
A sa lugì de su mundu,  
Lillu càandidu e giocundu,  
Chi tantu odori at ispartu;  
Aclamau cali partu  
De santu celesti amori.

Celestiali Cherubinu,  
Chi cumparis risplendentí,  
Ti declaras surprendentí  
De sa vida in su caminu;  
E t'aclamat Serafinu  
Sendu in terra viadori.

De sa primu gioventudi  
Ses de totus amirau,  
Àngelu in terra mandau  
Po modellu de virtudi;  
Mèdicu de sa saludi  
Fonti de ogna favori.

Giovuneddu in frisca edadi  
Predicadori famosu  
Gotori in Divinidadi  
Fatu obispu prodigiosu;  
Totus chi babu amorosu  
Ti reclamant cun favori.

Ses sempri acumpangiau  
De miràbilis portentus,  
T'obidint is elementus,  
De sa morti rispetau;  
De s'inferru scadenau  
Ses flagellu, ses terrori.

Bit su pòpulu aturdiu  
Apianai un'altu monti,  
Aberis perenni fonti  
Po sullieu a su sidiu,  
Su mortu torras biu,  
Su dèbili a vigori.

Cun portentu strepitosu  
Grandu pagi e cuncruia,  
Crescit àrburi froria  
De su bàculi prodigiosu;  
E s'erranti e su dudosu  
Sensant prontu s'errori.

O Santu tant'amirau  
De su pòpulu cristianu,  
De su tronu soberanu  
Aundi ses tui collocau  
A chi t'at invocau  
Dona eternu risplendori.

## GÒCIUS DE SANT'ANNA

Mama totu speciosa  
Prena de ardenti zelu  
**Prega po nosu in su celu**  
**Anna santa gloriosa**

Ses Anna in nobilesa  
De sa prus eleta genti,  
Ses che soli risplendenti  
In soberana bellesa:  
Adornada de puresa  
casta, bella e virtuosa.

Splendenti aurora serena  
Ses in edadi minori,  
Crescius cun grandu fervori  
Casi de gràtzias prena  
Ses de donus rica vena,  
Ses in nòmini gratziosa.

Ses po contzillu divinu  
In isposa destinada  
A sa virtudi aclamada  
De s'amabili Guachinu  
De sa vida in su caminu  
Ses istella luminosa.

Ses istèrili, afligia,  
In edari meda avantzada  
Ma po èssiri aturada  
A s'Eternu totu unia  
T'at formau de Maria  
Mama totu speciosa.

Sa tua perfeta unioni  
A sa Divina Voluntadi  
Rendit sa sterilidadi  
Digna de amiratzioni  
E sa tua produtzioni  
Est in totu prodigiosa.

Oh! cali celesti donu  
Ti rendit s'Onnipotenti  
Candu totu ubidenti  
Ti ddi prostras a su tronu!  
Oh! cantu Deus est bonu  
cun s'ànima virtuosa!

De sa mama de su Signori  
Ses istètia mama, o Anna  
E tra is mamas sa prus manna  
Sa prus digna de onori,  
Produsendi cussu fiori,  
Cussa prenda pretziosa.

Ses mama aventurada  
De sa Stella Matutina,  
De sa prus ecelsa Reina,  
De Maria Imaculada;  
De cudda ch'est aclamada  
Càndida e mìstica Rosa.

De una Filla tantu rara  
De tali bella aurora  
Ses tui s'allevadora,  
Ses tui sa mama cara;  
Ses tui novella Sara,  
de Deus filla amorosa.

De is giòvanas ses sa ghia,  
De is mamas ses cumentu,  
De sa stèrili in turmentu  
Ses cunfortu e allirghia,  
Sendi mama de Maria  
In celu tanti poderosa.

A s'amàbili Maria  
Ch'iaſt portau in su sinu,  
Incumanda de continu  
Sa divota cristianìa,  
Po lograi sa cumpangia  
De cussa Pàtria dicsosa.

Mama totu speciosa  
Prena de ardenti zelu  
Prega po nosu in su celu  
Anna santa gloriosa

## GÒCIUS DE SANTA LUGIA

Ses sa lugí meda ermosa  
Ch'illúminas is mortalís;  
**Dona rimédiu a is malis,**  
**Lugia Santa Gloriosa.**

Siracusa de Sicília  
Est sa pàtria tua dicensa,  
Aundi nascis, bella rosa,  
De illustríssima família,  
Cristiana giusta e sintzilla  
Caritativa e piedosa.

De sa prus pitica edadi  
A Gesùs cun puru amori  
Ddi sacrificias su flori  
Lillu de virginidadi  
Cun afetu e caridadi,  
Allirga e meda gustosa.

De bellesa singulari  
Ti at dotaus su Signori,  
Po un'ecessu de amori  
E donu particulari  
De gràtzias casi unu mari,  
Ti at fatu prodigiosa.

Po èssi vera imitadora  
De s'Isposu tú sagrau  
A is pòberus as donau  
Bènis e prendas ancora:  
Sentza èssi tui Signora  
De sa prus mímina cosa.

Cust'ispóliu voluntàriu  
Ti at móvidu gherra forti,  
E procurau sa morti  
A istàntzia de s'avarsàriu,  
Chi si crediat temeràriu,  
Tènniri a tui po isposa.

De Pascàsiu Presidenti  
Ses istétia cundennada  
A èssi luegu portada  
A domu de infami genti;  
Ma Deus ti fait potenti  
Immóbbili e Poderosa.

De fogu ardenti ingiriada  
Ti bis tui portentosa:  
Cantas allirga e gososa  
E de issu non ses tocada.  
Ti trapassant un'ispada  
In su tzugu meda furiosa.

Aici totu trapassada  
Arricis s'Eucaristia  
E predisis s'allegria  
De sa pagi suspirada,  
a pustis ses ispirada  
Cuntenta e meda dicensa.

Ses columna meda forti  
De sa fidi e de puresa  
Chi no at pótziu sa fieresa,  
De is tormentus, ne sa morti  
Faidí cambiai de sorti,  
O Santa vitoriosa.

Ses sa lugí meda ermosa  
Ch'illúminas is mortalis;  
Dona rimédiu a is malis,  
Lugia Santa Gloriosa.

## GÒCIUS DE SANTU PÌLIMU

Gia chi tanti prodigiosu  
Ses po divinu favori  
**Sias nostu intercessori**  
**Santu Pilimu Gloriosu.**

De genti illustri e pagana  
Bis in Sardigna sa lughi;  
A bint'annus de sa grugi  
Bis sa scienzia sobrana;  
E sa fidi cristiana  
Luegu abbrassas fervorosu.

Sa divina onnipotènzia  
In su flori de s'edadi  
T'infiamat de caridadi  
De fèrvida penitènzia,  
A solu e in s'astinenzia  
Circas s'eternu riposu.

In s'aspra costa perdosa  
Bivis vida angelicali  
Megina a dogna mali  
In sa gruta orrorosa:  
Sa genti fervorosa  
T'incontrat amorosu.

Ses apòstolu ferventi  
De Cristus crucifissau;  
S'Evangeliu as predicau  
A totu sa sarda genti,  
Ch'iscurtat divotamenti  
Custu Apòstolu diciosu.

Po tanti zelu e fervori  
Su Presidenti inumanu  
Cun Eìiliu e Lucianu  
Ti persighit cun vigori,  
E t'inserrat cun furori  
In su presoni orrorosu.

Ses, o Pilimu, innocentu  
Postu imparis cun is reus;  
Chi adoris is falsus Deus  
Cumandat subitamenti  
Felici su Presidenti  
Cun editu rigorosu.

Cun populari furori  
Ses a su templu portau,  
Ma a su populu adunau  
Sa lei de su Segnori  
Cun singulari fervori  
Isplicas coragiosu.

Su Presidenti ostinau  
Po consighiri s'intentu  
Imbentat dogna tormentu  
Cun su Martiri sagraru:  
Ma de totus as triunfau  
O gherreri valorosu.

Una spada finalmenti  
Fini ponit a sa gherra:  
De custa infelici terra  
Partis anima ferventi:  
Bola columba innocentia  
A su regnu aventurosu.

De s'altu tronu de onori  
Aundi ses tui collocau,  
De sa Sardigna abogau  
Miranosì cun amori,  
E fai chi su Segnori  
Nos' ascurtit piedosu.

Otenosì de Deus  
Regorta abundantis  
Mira comenti costantis  
A s' abba cicheus  
Aici siat cun Deus  
Babu nostru amorosu

De nosu teni memòria  
In s'ora estrema de morti,  
Po chi tengaus sa sorti  
De consighiri vitoria  
In s'altu regnu de glòria  
De pagi eterna e riposu

Gia chi tanti prodigiosu  
Ses po divinu favori  
Sias nostu intercessori  
Santu Pìlimu Gloriosu.

## GÒCIUS DE S'IMACULADA VÌRGINI MARIA

Salve, nóbili creatura,  
Salve, bèni aventurada,  
**Tra is Vírginis sa prus pura**  
**Ses, Maria Immaculada.**

Finas de s'eternidadi  
Pura a is ogus de s'Altíssimu  
Ses tui lillu giucundíssimu,  
Puru e castu in dogna edadi.  
De s'augusta Trinidadadi  
Filla e isposa sublimada,

De s'Eternu mamma e isposa,  
O sublimi altu mistériu,  
Cun sapienti magistériu  
Est cust'ànima pretziosa,  
Superiora a dogna cosa  
Cun privilégiu formada.

De s'Eternu architetau  
Custu templu castu e puru,  
Tabernàculu seguru  
Aundi Deus s'est incarnau  
In s'iscritura ortu serrau  
Maria sola est figurada.

O de s'ómini critériu  
Cun sa fràgili arregoni  
Maca vana presuntzioni  
Bollit biri in su mistériu  
Candu a altu ministériu  
De s'Eternu est destinada.

Su fanàticu furori  
De s'ómini miscredenti  
Non ti bolit innotzenti,  
Ndi eclissat su candori,  
Ma dissipat Deus s'errori  
E benis prus esaltada.

In custu século oh! Glòria  
Illibbada Cuncetzioni,  
Ti cufessat sa arregoni  
E ndi marcat sa memòria  
Intada ses in sa stòria  
De sa culpa preservada.

Ses de Adamu discendentí,  
Ti narat, Maria, s'erégiu,  
Ma non bit su privilégiu  
De sa manu onnipotenti  
Chi ti fait de culpa esenti  
In sa culpa generada.

. De sa morti triunfadora  
Su serpenti at calpestau,  
Solu in issa no est passau  
Su velenu, o alta Signora.  
Po Maria est s'últim'ora  
Serena, felitzi e biada.

Cun marmòreus monumentus  
Sa memória est tzelebrada,  
Fiat a tantu riservada  
De is eternus pentzamentus,  
Cun prodígius e portentus  
Sa chi Deus inamorada.

Su Pontífitzi inspirau  
Ti venerat, o biancu lillu,  
Riunit prontu su Contzillu  
E sentza mància ni pecau  
Solennementi at declarau  
Maria sèmpiri intemerada

Risplendenti bell'aurora,  
Maria luna mai eclissada,  
Piedosa Mamma invocada  
De aflitus consoladora,  
Tui proteginosí in s'ora  
De vida prus afannada.

Su dolori sa tristura  
De sa genti desolada  
Spargi de santa dultzura,  
Maria, sèmpiri immaculada.

## GÒCIUS DE SANTU ANTONI DE SU FOGU

Penitenti prodigiosu  
De is solitàrius modelu.  
**Prega po nosu in su celu**  
**Antoni, santu gloriosu**

Cun splendori infinitu  
donat Antoni cun fama  
de nobili babu e mama  
Coma, citadi in s'Egitu,  
po essi in ognà conflitu  
eroi invitù e famosu.

De s'eternu amori fertu  
In sa prus florida edadi  
Circandu sa santidadi  
andastis a su desertu.  
E a Deus ti ses ofertu,  
cun afetu amorosu.

Is dimonius infernalis  
s'impegnant a ti tentai  
po ti ndi pòdiri furai  
is donus celestialis  
parandu latzus mortalis  
cun ispiritu orrorosu.

Antoni, cun fortilesa  
A s'inferru ponit gherra,  
Ponit totus in terra  
Is dimònius cun lestresa.  
Riportandu in ognia impresa  
Sa corona vitoriosu.

Su soli in primu Orienti  
Pregandu at incontrau.  
E pregandu s'at lassau  
declinau in s'Occidenti  
Senza tènniri po nienti  
su corpus flacu riposu.

S'evangelica doctrina  
Chi in sa Cresia aprèndiu eis,  
In pratica dda poneis  
Cun prestesa peregrina  
Donandu a sa bogi divina  
Prontu assensu fervorosu.

De su fogu difensori  
bos'acclamant is divotus  
Giai chi po bosu a totus  
Gràzias donat su Signori  
E po custu cun onori  
s'acclamant prodigiosu.

Candu benit a mancai  
prenda alguna de valori  
Bosu Antoni intercessori  
Danos lugì a dd'incontrai.  
Su furau feis torrai  
de su ladroni ambiziosu.

Su corpus po castigai  
circais modus e maneras  
passandu notis interas  
senza nudda riposai.  
Cun s'intentu de logra  
pustis mortu, su riposu.

Gosandu in s'eternidadi  
Cun meritus infinitus  
Pregai po nosu afluxus  
In sa celesti citadi  
Po sa bosta santidadi  
Tengaus s'eternu gosu.

Penitenti prodigosu  
De is solitarius modelu.  
**Prega po nosu in su celu**  
**Antoni, santu gloriosu**



